



TOSHKENT DAVLAT YURIDIK UNIVERSITETI REKTORINING B U Y R U G ' I

13.10.2023

594-tm-son

Talabalarga hayfsan e'lon qilish to'g'risida

Bugungi kunda universitetda yuqori malakali, zamonaviy yuridik kadrlarni tayyorlash maqsadida talabalarni ma'naviy-axloqiy tarbiyalash, ularning huquqiy madaniyati va ongini oshirish bo'yicha samarali tizimni yaratish, ularda yuksak ma'naviy-axloqiy fazilatlarni shakllantirish hamda rivojlantirish maqsadida bir qator kompleks chora-tadbirlar amalga oshirilmoqda.

Shunga qaramasdan ayrim talabalar tomonidan universitet Odob-axloq kodeksi qoidalarini buzish holatlari kuzatilmoqda.

Jumladan, 2023-yil 25-sentabr kuni dars jadvaliga muvofiq universitet Ommaviy huquq fakulteti Davlat-huquqiy faoliyat yo'nalishi B variant talabalariga o'qituvchi D.Murodullayev tomonidan Mehnat huquqi fanidan ma'ruza mashg'uloti olib borilgan. Mazkur dars jarayonida talaba Yarashev Navruzbek Nurmuhammad o'g'li rasmiy muloqot me'yor va qoidalarini buzgan holda talaba A.Kimsanboyevga hamda dars jarayoniga hurmatsizlik qilib, qo'pollik bilan behayo so'zlar ishlatgan.

Mazkur holat bo'yicha o'qituvchi D.Murodullayev tomonidan bildirgi kiritilib, unda talaba Yarashev Navruzbek Nurmuhammad o'g'li dars jarayonida o'ta qo'pollik bilan so'kingani va buning uchun umuman pushaymon bo'lmagani sababli talabaga nisbatan tegishli chora ko'rish so'ralgan.

Talaba N.Yarashev o'z tushuntirish xatida dars jarayonida behayo so'z bilan so'kinganini tan olgan.

Talaba N.Yarashev mazkur harakati bilan TDYU Odob-axloq kodeksi 17-moddasi ikkinchi xatboshisi (har qanday huquqbuzarlik yoki jinoyat sodir etish, jumladan, tuhmat qilish, haqoratlash;), 18-moddasi 2-qismi (xodim, talaba va doktorantlarning o'zaro munosabatlarida inson qadr-qimmatiga hurmatsizlik, shaxsiyatni kamsitish, o'zganing intellektual mulkini o'zlashtirib olish, qo'pollik, behayo so'zlar ishlatish, mushtlashish qat'iyan man etiladi) talablarini buzgan.

Shuningdek, 2023-yil 25-sentabr kuni dars jadvaliga muvofiq universitet Ommaviy huquq fakulteti Davlat-huquqiy faoliyat yo'nalishi rus A variant talabalariga o'qituvchi X.Mamatkulova tomonidan Jinoyat protsessual huquqi fanidan ma'ruza mashg'uloti olib borilgan. Mazkur dars jarayonida talabalar Rizayev Eldorjon Ne'matjon o'g'li va Kamalov Ulug'bek Turg'un

o'g'li dars mashg'uloti olib borishga halaqit qilgan holda shovqin ko'targan hamda o'qituvchi tomonidan berilgan tahbehlariga bo'ysunmagan. Qolaversa, mazkur dars mashg'ulotida Xojimatov Sardorbek Dilshodjon o'g'li o'qituvchi tomonidan ogohlantirish berilganiga qaramasdan uning ruxsatisiz bemaqsad telefondan foydalanib o'tirgan.

Mazkur holat bo'yicha o'qituvchi X.Mamatkulova tomonidan bildirgi kiritilib, unda talabalar Rizayev Eldorjon Ne'matjon o'g'li, Kamalov Ulug'bek Turg'un o'g'li va Xojimatov Sardorbek Dilshodjon o'g'li dars mashg'uloti olib borishga halaqit qilganliklari uchun ularga nisbatan tegishli chora ko'rish so'ralgan.

Talabalar E.Rizayev, U.Kamolov va S.Xojimatov o'z tushuntirish xatida dars mashg'uloti olib borishga halaqit qilganliklarini tan olgan.

Talabalar E.Rizayev va U.Kamolov mazkur harakatlari bilan TDYU Odob-axloq kodeksi 27-moddasi sakkizinchi xatboshisi (o'quv jarayonida pedagog xodimning ko'rsatmalariga qat'iy rioya qilishga;) va to'qqizinchi xatboshisi (dars vaqtida gaplashmaslik hamda dars mashg'ulotiga taalluqli bo'lmagan ishlar bilan shug'ullanmaslikka;) talablarini, talaba S.Xojimatov esa TDYU Odob-axloq kodeksi 21-modda (Dars mashg'ulotlari vaqtida uyali aloqa vositalaridan foydalanish barcha uchun qat'iy taqiqlanadi, pedagog xodimlar tomonidan dars jarayoni bilan bog'liq yoki uzrli holatlar bundan mustasno. Talabalarga uyali aloqa vositalaridan foydalanishga zarur va uzrli holatlarda pedagog xodimning ruxsati bilangina ruxsat etilishi mumkin) talabini buzgan.

Shu bilan birga, 2023-yil 28-sentabr kuni dars jadvaliga muvofiq universitet Ommaviy huquq fakulteti Davlat-huquqiy faoliyat yo'nalishi B variant talabalariga o'qituvchi Z.Bebutova tomonidan Fuqarolik protsessual huquqi fanidan seminar mashg'uloti olib borilgan. Mazkur dars jarayonida talaba Mamajonov Iqboljon Inomjon o'g'li dars mashg'ulotiga tayyor bo'lmasdan kelgani, seminar mashg'uloti doirasidagi savolga talaba javob taqdim qilmaganligi, keyin esa o'qituvchi tomonidan savolga tushuntirish berilganda "menga yanada chuqurroq tushuntirib bering" deya o'qituvchini vaqtini olgan holda darsdan chalg'itgani, o'qituvchining "nega darsga tayyorlanib kelmadingiz, tayyorlanib kelganingizda tushunarli bo'lar edi, endi o'zingiz o'qib o'rganib olasiz" degan gapiga talaba tomonidan "bu sizning vazifangiz" deya javob berilgani aniqlangan. Shundan so'ng o'qituvchi tomonidan talaba dars mashg'ulotida tik turish so'ralganda talaba "bunga haqqingiz yo'q" deya qo'pollik bilan javob qaytargan hamda joyiga o'tirib olgan. O'qituvchi talabani darsga halaqit bermaslik uchun auditoriyani tark etishini so'raganda talaba tomonidan bu holat ham qasddan rad etilgan hamda dars jarayonining qolgan qismida talaba o'qituvchi ruxsatisiz bemaqsad telefondan foydalanib o'tirgan.

Qolaversa, ushbu dars jarayonida talaba Abdulloyev Sardorbek Safarovich ham darsga tayyorlanmasdan kelgan hamda dars paytida boshqa fan (Mehnat huquqi) bilan mashg'ul bo'lgan. Ushbu holat yuzasidan o'qituvchi tomonidan ogohlantirish berilganda talaba unga hurmatsizlik bilan javob qaytargan. Bundan tashqari talaba dars paytida o'qituvchi ruxsatisiz hamda tanbehlariga qaramasdan bemaqsad telefondan foydalanib o'tirgan.

Mazkur holat bo'yicha o'qituvchi Z.Bebutova tomonidan bildirgi kiritilib, unda talabalar Mamajonov Iqboljon Inomjon o'g'li va Abdullayev Sardor Safarovich dars jarayonida rasmiy muloqot me'yor va qoidalarini buzgan holda o'qituvchiga hurmatsizlik qilganligi, beruxsat telefondan foydalanganligi va pedagog xodimning ko'rsatmalariga qat'iy rioya qilmaganligi uchun ularga nisbatan tegishli chora ko'rish so'ralgan.

Talabalar I.Mamajonov va S.Abdulloyev mazkur harakatlari bilan TDYU Odob-axloq kodeksi 18-moddasi 2-qismi (xodim, talaba va doktorantlarning o'zaro munosabatlarida inson qadr-qimmatiga hurmatsizlik, shaxsiyatni kamsitish, o'zganing intellektual mulkini o'zlashtirib olish, qo'pollik, behayo so'zlar ishlatish, mushtlashish qat'iyman etiladi), 21-modda (Dars mashg'ulotlari vaqtida uyali aloqa vositalaridan foydalanish barcha uchun qat'iyman taqiqlanadi, pedagog xodimlar tomonidan dars jarayoni bilan bog'liq yoki uzrli holatlar bundan mustasno. Talabalarga uyali aloqa vositalaridan foydalanishga zarur va uzrli holatlarda pedagog xodimning ruxsati bilangina ruxsat etilishi mumkin) hamda 27-modda sakkizinchi xatboshisi (o'quv jarayonida pedagog xodimning ko'rsatmalariga qat'iy rioya qilishga;) talabalarini buzgan.

Shuningdek, 2023-yil 3-oktabr kuni dars jadvaliga muvofiq universitet Ommaviy huquq fakulteti Davlat-huquqiy faoliyat yo'nalishi B variant talabalariga o'qituvchi S.Shukurullayev tomonidan Fuqarolik protsessual huquqi fanidan ma'ruza mashg'uloti olib borilgan. Mazkur dars jarayonida talaba Xudayberganov Baxtiyor Aktam o'g'li yon atrofidagi talabalar bilan gaplashib, o'qituvchi tomonidan dars mashg'uloti olib borilishiga halaqit bergan. Shundan keyin o'qituvchi tomonidan talabaga ogohlantirish berilgan holda undan dars davomida tik turish so'ralgan. Talaba ushbu holatda ham dars jarayoniga halaqit qilganligi bois o'qituvchi tomonidan talabaga dars mashg'ulotini tark etish so'ralganda talaba tomonidan hurmatsizlarcha qo'pol munosabatda va ohangda javob qaytarilgan. Shundan so'ng o'qituvchi talabani dars mashg'ulotdan chiqartirishni so'rab dekanat xodimlariga xabar bergan.

Mazkur holat bo'yicha o'qituvchi S.Shukurullayev tomonidan bildirgi kiritilib, unda talaba Xudayberganov Baxtiyor Aktam o'g'li dars jarayonida rasmiy muloqot me'yor va qoidalarini buzgan holda o'qituvchiga hurmatsizlik qilganligi, dars vaqtida gaplashganligi hamda dars mashg'ulotiga taalluqli bo'lmagan ishlar bilan shug'ullanganligi va pedagog xodimning ko'rsatmalariga qat'iy rioya qilmaganligi uchun unga nisbatan tegishli chora ko'rish so'ralgan.

Talabalar A. Xudoyberganov mazkur harakatlari bilan TDYU Odob-axloq kodeksi 18-moddasi 2-qismi (xodim, talaba va doktorantlarning o'zaro munosabatlarida inson qadr-qimmatiga hurmatsizlik, shaxsiyatni kamsitish, o'zganing intellektual mulkini o'zlashtirib olish, qo'pollik, behayo so'zlar ishlatish, mushtlashish qat'iyman etiladi) 27-modda sakkizinchi xatboshisi (o'quv jarayonida pedagog xodimning ko'rsatmalariga qat'iy rioya qilishga;) hamda 27-modda to'qqizinchi xatboshisi (dars vaqtida gaplashmaslik hamda dars mashg'ulotiga taalluqli bo'lmagan ishlar bilan shug'ullanmaslikka;) talabalarini buzgan.

Yuqoridagilarni inobatga olib, Oliy ta'lim to'g'risidagi nizom (ro'yxat

raqami 1222, 2003-yil 22-fevral)ning 51-bandi, universitet Odob-axloq kodeksi 17-moddasi ikkinchi xatboshisi, 18-moddasi 2-qismi, 21-moddasi, 27-moddasi sakkizinchi va to'qqizinchi xatboshilari hamda Toshkent davlat yuridik universiteti Ichki tartib qoidalari (ichki mehnat tartibi qoidalari)ning 83-bandiga asosan

BUYURAMAN:

1. Universitet Ommaviy huquq fakulteti Davlat-huquqiy faoliyat yo'nalishi 3-kurs talabalari Yarashev Navruzbek Nurmuhammad o'g'li, Rizayev Eldorjon Ne'matjon o'g'li, Kamalov Ulug'bek Turg'un o'g'li, Xojimatov Sardorbek Dilshodjon o'g'li, Mamajonov Iqboljon Inomjon o'g'li, Abdulloyev Sardorbek Safarovich va Xudayberganov Baxtiyor Aktam o'g'liga hayfsan intizomiy jazo chorasi qo'llanilsin.

2. Fakultet dekanlari (Sh.Saydullayev, D.Umarxanova, B.Musayev, D.Kamalova, A.Babadjanov) mazkur buyruq bilan qo'llanilgan intizomiy jazo chorasini talabalar shaxsini sir saqlagan holda talabalar o'rtasida shu kabi holatlar takroran yuzaga kelmasligi, ularda dars mashg'ulotlari hamda professor-o'qituvchilarga bo'lgan hurmatni shakllantirish maqsadida barcha talabalar e'tiboriga yetkazish choralari ko'rsin.

3. Ommaviy huquq fakulteti dekani (Sh.Saydullayev):

mazkur holat va shu kabi qoidabuzarlik ushbu talabalar tomonidan takroran sodir etilsa, ularni talabalar safidan chetlashtirish mumkinligi to'g'risida ogohlantirsin;

mazkur talabalarning shaxsiy hujjatlar yig'ma jildlariga buyruq nusxasi tikilishini ta'minlasin.

4. Mazkur buyruq bajarilishini nazorat qilish Yoshlar masalalari va ma'naviy-ma'rifiy ishlar bo'yicha birinchi prorektor A.Xashimhonov zimmasiga yuklansin.

Rektor v.v.b.



I.RUSTAMBEKOV

Toshkent shahar

Kiritildi:

Dekan (fan doktori yoki fan doktori
(Doctor of Science) ilmiy darajasiga
yoki xorijiy davlatlarning unga
tenglashtirilgan boshqa ilmiy
darajalariga yoki professor ilmiy
unvoniga ega bo'lgan)

SH.SAYDULLAYEV

**Kelishildi:**

Yoshlar masalalari va ma'naviy-
ma'rifiy ishlar bo'yicha birinchi
prorektor

A.XASHIMHONOV



Direktor

SH.PO'LOTOV



Katta yuriskonsult

A.TURSUNOV

